

**An d Zueschauer vom Cortège  
Am Stroosserand  
4051 Basel**



**VÖLGGERBALL!**  
Alti Stainlemer - Fasnacht 2016

## Spändeufruef:

Liebi Lääser vo unserem nätte Brief,  
uff dären Ärde laufft öbbis grausam schief.  
Die ganz Wält-Oornig grootet uss de Fuege –  
Dasch Dir glyych? Denn due aifach Cortège luege.

Alli andere lääse bitti wyter,  
denn es isch scho schlimm und wird als wie schyter.  
Wenn au Du vor Sorge nümm guet kasch pfuuse,  
hälfe mir Dir uss em Dilemma uuse.

Denn ganz bestimmt bloogt au Di s schlächte Gwüsse,  
wenn im Färnsee seesch und drum gnau duesch wüsse,  
ass Millioone vo Mensche flüchte dien,  
das wäge Not, Eländ und Angscht mache mien.

Überlegg Dr mol, wie wyt, ass es miesst koo,  
bis au Du Dy Huus und Haimet wurd sch verloo?  
Alles uffgää und Dyny Zält abbräche;  
in See und en ungwüssi Zuekunft stäche.

Füülsch Dy denn nit au e glai weeneli myys,  
wenn Du waisch, mir lääbe wie im Paradyys,  
will mer doo geboore sin und drum Schwain hän ghaa?  
Was jetzt grad bassiert, goot ys alli öbbis aa!

Mir sott nämmlig au immer draa dängge,  
ass dr Weschte syt langem die Wält duet längge.  
Statt ass mer ys über d Flüchtling beklaage,  
mien mer frooge, welli Mitschuld mir draage.

D Flüchtling gän s letschte Gäld so Schlebber-Bande,  
in dr Hoffnig, ass sy au neume lande,  
wo s Lääbe noon e Perspeggtive bietet  
und nit Armut, Krieg oder Terror wietet.

Die Lüt hänn wirgglig gar nüt me z verliere,  
wenn sy sich entschaide, die Flucht z riskiere.  
Si wüsse genau, es stärben e Huffe,  
dien eländ verstigge oder versuffe.

E Völgerwanderig isch doo jetzt im Gang,  
und drum goots logischerwyys gar nit so lang,  
bis die, wo s schaffe, Europa erraiche –  
und Europa setzt au düttligi Zaiche.

Die ainte dien e Haag an d Gränze stelle,  
anderi numme Durchraisendi zelle.  
Und gwüssi sinn offe und humanitär,  
saage „mir schaffe das“, dasch doch nit so schwär.

Yzaaligsschynn uff dr Ruggsytte ►►►



Soll Dy Bueb mee als nur Fasnacht mache könne, kumm diräggt am  
20. Hornig oder 27. Hornig vo 2 bis 4 an Schnubberapéro in unsere Käller  
am Aubärg 2b oder informier dy unter: [www.jungi-stainlemer.ch](http://www.jungi-stainlemer.ch).

D Ladäärne-Uusstellig uff em Minschterplatz und d Waage- und  
Reggwisyte-Uusstellig bi dr Kasäärne sin vom Määntig znacht bis am  
Mittwuch demoorge!

Am Fritig und Samschtig, 19. und 20. Hornig isch Noochwuggswärbig vo  
dr 1. Lektion im Zält uff em Barfi.



